

nos geruntur, docentur, suscipiuntur, atro calculo notant, aut omissis reliquis *Doctrinam* saltem aggrediuntur. Nec hic per singula ire animus est, sed seligere saltem alterum genus, quo doctrinam nostram execrantur, omnibus quibus possunt diris & tanquam haeresin pessimam fulmine ferire non verentur. Quid hoc in negotio gestum sit ab adversariis, quibusve contumeliis nostram doctrinam, quam tamen norunt esse coelestem & vere Apostolicam, invaserint, tot loquuntur volumina, quotquot a tempore Reformationis edita fuerunt in lucem, ita ut velut certamen aliquod iniisse viderentur scriptores, quis illorum veritatem a nostratibus expositam acerbissima perstringeret censura.

§. IV.

Ut vero eo luculentius constaret, non privatis saltem opinionibus rem geri, sed toti coetui adversariorum, in collectione spectato, eandem mentem sedere; haereticis qui unquam extiterunt, pessimis & profligatissimis, nos accensere illi solent, quod notius est, quam ut probari debeat amplius. Evincit hoc praeter alia documenta bulla Papalis, quae Coenae dominicae dicitur, atque in *Bullario CHERUBINI T. III. p. 248.* legitur, prout a Paulo V. nec non Urbano VIII. amplificata & publicata est. Nam cum olim solum in piratas marinos directa esset, tandem haeretici illis adjuncti, *Gazari, Patareni, Pauperes de Lugduno, Arnaldistae, Speronistae, Passageni, Wiclefistae seu Ussitae, Fratricelli de opinione nuncupati*, quibus tandem LUTHERUS associatus est, omissis vero reliquis deinceps soli nominati *Ussitae, Wiclefistae & Lutherani*, quibus comites additi, *Zwingliani, Calvinistae, Ugonotti, Anabaptistae, Trinitarii & omnes ac singuli haeretici &c.* qui anathematis fulmine sic percutiuntur, ut candela die viridium accensa & de altari dejecta communionem illa ex-

clusi